

Competencia di canalnan di Television a trece cambio di verdad

Manera a publica siman pasa, awe mi kier comenta riba nos canalnan di television, ATV, CSS y Tele Aruba. Por a nota cu den varios categoria, e canalnan a competi fuertemente cu e mes transmisionnan y e diferente tipo di programanan, cada un na su manera.

E "MATRAS" DI RESCATE DI ATV TA HISTORIA

Alfabeticamente ta cuminsa cu ATV cu mester di comienzo caba un felicitacion grandi pa nan "Jingle di Pasco".

E jingle aki tabata masha profesional hinca den otro, cu un composicion precioso di Chucho Hoek, y a habri caminda tambe pa otro aña e otro canalnan bini cu di nan.

E aña aki tabata aña di cobertura di campeonato mundial di futbol cu a bira un fiesta di pueblo, y ATV a haci e un fiesta verdadero for di prome dia, transmitiendo for di diferente sitio unda e weganan tabata wordo mira pa cantidad di hende. E improvisacion ultimo dia dilanti Royal Plaza cu brassband y banda di Samba a resulta verdad den un fiesta grandi di mainta te anochi.

E otro hit di ATV e aña aki tabata e cobertura di Eclipse Solar cu localmente tabata e evento di aña. Despues di a drenta den contacto varios luna adelanta cu expertonan pa logra nan datonan, dia di eclipse ATV a sobresali cu su transmision na The Mill, Seaport, Sero Colorado y na Yamanota unda tambe un publico local grandi a acudi.

Geraldine Muller, Tessa Pietersz, Dilma Arends y Jacqueline Suttel a haci un trabao masha admirable e dia aki.

Riba tereno di carnaval, ademas di nan transmisionnan di e diferente paradanan y actividatnan, "Ariba Abao" a pega manera lijm cu Ruben Garcia.

Otro hit grandi internacional di ATV tabata e cobertura cu Carolina Rojas-Lacle a haci na Venezuela durante dianan prome, durante y despues di eleccion di president di Venezuela. El a logra algo cu den un pais manera Venezuela, bo no ta logra facil y si bo logra mes, ta hopi barera mester pasa.

Carolina a haci trabao tremendo cu su reportahenan y entrevistanan cu tur e candidatonan y hasta cu Hugo Chavez cu a wordo eligi president y a manda na mes momento saludo pa nos isla.

Patrick Paskel a logra su hit di aña, no solamente cu su reportahenan riba dragrace, pero su exito di mas grandi tabata mey mey di orcan Georges na St. Maarten y e reportahe cu el a graba.

Cadochi Kock tabata tin su aña deportivo tambe y masha aprecia tabata su empeño pa trece no solamente deportenan grandi de picture pero tambe deportenan chiquito, y nos deportistanan "chiquito" cu masha poco medio di comunicacion ta corda ariba pasobra nan no ta den categorianan halto. Riba tereno di mucha masha di elogia tabata su transmision cu nos muchanan di Pee Wee League, jovennan di 8 aña di edad cu ta haciendo nan prome pasonan den mundo di baseball.

Transmisionnan di drag-race di karting mester di un "pluimpje" sigur pa e productor y director di programa, Emily Hudson cu tambe tabata tin varios programa bunita hinca den otro y dirigi.

Giovanni Muller tambe cu su specialnan y su programa riba tereno di finanzas tambe a pega fuerte.

E cambianan cu a ripara durante aña tabata den noticieronan cu Ruben Trappenberg, Geraldine y Jacqueline cu e diferente segmentonan nobo cu segun mi tin entendi lo wordo aumenta e aña venidero, locual ta un compromiso dificil pa television pa no descuida otronan.

Di e totalidad di reportahenan di ATV no por keda sin menciona e trabao di rescate di e equipo di reportahe durante candela di "Leco" caminda a tira matras riba truck di reportahe pa baha hende for di edificio y laga bula riba e truck pa baha di e edificio na candela na skina di Emanstraat-Emmastraat.

TELE ARUBA A PEGA RIBA SU ANIVERSARIO

Tele Aruba no a haya tempo pa p or a haci-mucho mehoracion e aña aki cu tabata na aña di 35 aña di existencia.

Tele Aruba mester a haya su mes obliga di keda riba e aniversario mayoria di lunanan di 98 debi na dificultadnan di equipo.

E dificultad tabata basa riba e expansion cu Tele Aruba kier a haci pero a haya nan mes cu problemanan di bouwvergunning, instala mast nobo, zender y antenne nobo, cual trabaoan ainda no ta cla, pero cu Tele Aruba ta spera cu den prome lunanan di 1999 nan lo ta cla pa normalidad atrobe. E celebracion a keda como e actividad grandi di aña terminando cu rifa di auto y show grandi dilanti studionan.

Tele Aruba tambe a percura pa reportahenan riba Eclipse pero no extenso manera ATV debi na su problemanan, pero a keda riba informacionnan di exterior y colaboracion cu exterior, principalmente Venevision.

Den mundial Claret Lopez tabata "mas up to date" cu informacionnan diariamente prome, na sosiego y despues di weganan di Mundial 98. Por a nota esaki claramente cu despues di e transmisionnan aki, por a lesa y tende di e informacionnan aki den otro medianan. Tanto Claret, Carmichael y ultimamente Demetrio Maduro, durante 98 a haci un trabao sublime cu e programa "Nos grandinan na palabra" cu a bira un di e favoritonan di hopi hende.

Un programa cu a cay masha na agrado e aña cerca hopi tabata tambe "Contacto Latino" di Wilfredo Castillo tur diadomingo y hopi comenta.

A pesar di nan limitacionnan, e noticieronan cu Ivo y Jerney merdia y Carmichael cu su seccion di deporte, Jonchito Croes, y Claret Lopez a percura pa bon informacion y agradable.

Anochi Tito Lacle cu Glenda of cu Adeline of Jelitza tambe a destaca a pesar di e problemanan tecnico cu e aña venidero lo mehora considerable na Tele Aruba.

toch no por keda sin menciona e di cuatro "Cacique de Oro" cu Tele Aruba a gana e aña aki di Venezuela y esaki ta danki grandemente na e colaboracion cu Tele Aruba tin masha hopi cu Venevision, Radio Caracas Television y Televen, riba tur tereno sea directo, via videotape of cu asistencia na Aruba.

Adeline Rooyer y camarografo George Jacobs tambe a haci un trabao excelente na Venezuela durante eleccion di president di Venezuela y cu entrevista cu Irene Saez, Salas Romer y president electo Hugo Chavez.

Programa cu a keda fuerte ta Show-Time di Rino Kuiperi, den un estilo poco diferente di su tata difunto Tico, pero cu a keda como e Nr. 1 di television den e categoria aki. Masha contento mi a keda cu e reconocimiento cu el a haci ayera pa Eddy Peterson, alias "Jan Poets".

Pa 1999 ta conoci cu Tele Aruba lo ta den ambiente di "500 aña di desaroyo di Aruba". Mi a tende di esaki, pero mucho mi no por a saca afo ainda di e canal.

C.S.S. CRECIENDO Y CRECIENDO

C.S.S. e aña aki a haya mas acogida local cu añanan anterior y ta creciendo. Varios programa cu awe ta mira riba otro canalnan a haci nan prome paso aki, y por a nota cu Caribbean Super Station (di Caribbean Satellite Systems), C.S.S. a aumenta su cantidad di televidentenan.

Durante aña 98 Franky Kuiperi, Doc Williams, Dochi Lee, Patrick Loefstok, Harlem Villar y Nolly Becker a logra nan sintonia grandi cu Francia 98, y nan seccion di deporte tambe a bira masha popular cu Franky Kuiperi. Durante Eclipse Solar no a nota CSS asina activo manera e otronan pasobra CSS tabata tin un trabao importantisimo pa Aruba haciendo.

Esey ta percura pa CNN, Tele Curacao, ABC, Discovery Channel y NBC haya imagennan for di Aruba durante Eclipse Solar cu nan por a transmiti directo for di Aruba.

E hit grandi internacional tabata e reportahenan cu RAI television di Italia tabata haci via CSS relaciona cu e secuestro di Gianni Ferrara.

Otro hit tabata transmisionnan di actividatnan nacional na Corsow cu Aruba por a mira, manera entre otro Drag-race, Apertura di Staten, introduccion di Himno di Antias, Dia di Corsow.

Den temporada di orcan, Aruba ta pega na CSS cada 10 pa e ora, pa mira con e situacion di tempo ta pa nos isla y pa e region aki via Weather-Channel.

E reportahenan for di Corsow di Orcan Georges na St. Maarten tambe tabata masha sintonisa riba nos isla via CSS e aña aki.

Local a cay masha na agrado riba nos isla ta e link cu BBC caminda durante dia por mira e noticieronan y programanan di BBC transmiti via CSS y cu ta hopi sintonisa riba nos isla.

Segun un bon fuente, pa 1999 CSS lo expande su transmisionnan via satellite, bini cu mas deporte y noticia local y mas transmision di otro islanan pa nos isla.

"MR. MIRACLE" A HAYA SU RECONOCIMIENTO

Masha di aplaudi ta e gesto di Rino Kuiperi pa ayera anochi a duna Eddy Peterson, "Jan Poets" e reconocimiento cu Jan Poets a merece sigur sigur, pa su labornan.

Hopi hende sigur no conoce e Jan Poets cu "ta haci milager". E Jan Poets cu ta ser aprecia pa figuranan internacional, y mundial. E Jan Poets cu a yega na lugarnan caminda ningun otro periodista Arubiano, cu mi conoce di ultimo 40 aña a logra yega. Jan Poets cu a haci cosnan den e trabao aki, cu ningun otro prome cune a haci of a logra pa haci.

Jan Poets ta sali rond mundo, riba su propio "cartera" y tin biaha yuda pa "sponsornan" y cu companianan di avion cooperando, pa hiba "number di Aruba".

No number di Jan Poets, pero "number di Aruba".

Si mira cartanan, postkaarten y ripara yamadanan cu e ta ricibi di artistanan mundialmente conoci riba nan viahenan y riba dianan di fiesta, hende lo no kere cuanto aprecia Jan Poets aki ta.

Jan Poets ta yega unda ningun hende ta kere cu e lo yega.

Tur cos e ta haci spontaneamente. Si e bay NASA pa un reportahe y Jan Poets bisa: "mi ta percura pa drenta transbordador pa un vuelo", no hari... Jan Poets ta percura di un of otro manera.

Jan Poets ta mescos cu nos tur. Nos tin hendenan cu ta gusta nos manera, hendenan cu no ta gusta nos manera. Hendenan cu no ta gusta algo dibo y otronan cu si ta gusta etc.

Pero locual si no por kita di Jan Poets aki ta cu "e ta un trahador y ta hinca curpa y alma" den locual e ta bay haci pa su isla den exterior.

El a pasa den tur sorto di aventura cu Missnan di Aruba, cu D.2.U 365 brassband, cu artistanan grandi den stadionnan di miles y decenas di mil hende, New York durante parada Caribense, New Orleans durante Super Bowl, Puerto Rico, Colombia, India, Hawaii djies pa menciona algun, y si tende of mira con el a logra, ta cos cos kita sombre.

Jan Poets: E unico Arubiano cu a yega y kizas lo yega na manda un Donald Trump unda el a sali, y despues sinta na mesa y conversa tranquil cu e magnate aki.

Poetsje (manera mi ta yame) pabien, bo a merece e homenaje di Show Time y mi respet ta pa bo, a pesar cu riba diavermanan nos ta bolbe sinta "hala otro cu palabra".

Juby